

摛藻堂四庫全書薈要

集部

欽定四庫全書薈要

集部

御選明詩卷五十四

詳校官原任事臣李斯冰

欽定四庫全書
薈要卷一萬八千五百五十四

集部

御選明詩卷五十四

五言律詩五

倪光

宿清村

地闊江流險天空山勢高望鄉雙淚落為客一身勞斜
日飛沙鳥西風動野蒿一舟依岸宿深竹夜騷騷

陳韜

題湖州慈感寺

過溪纔百步橋轉入禪關高閣斜臨水平林遠見山波
光隨鳥度秋色共雲閒深愜幽人趣遲留忘却還

黎擴

西瀉草堂為廬陵宋內翰賦

聞說西溪上春風小院開野蠶成繭盡江燕引雛回竹
裏園基局荷香沁酒杯晚涼疎雨過隨意步蒼苔

聞說西溪上波光映遠天吟蛩催急杵落雁近漁船紅

樹斜暉淡黃花曉露鮮田家新釀熟共醉月明邊

送人還盱江

新涼生白苧遊子倍悽然客思秋砧外鄉心旅雁前西
風千里道斜月五更船亦有還家夢隨君到汝川

朱顯

歲暮柯亭道中

行旅正紛然危亭古道邊晚峯千樹雪寒隴幾家烟孤
棹荒城外歸心去鳥前浮踪未能定况復值殘年

桑悅

送春

年換朱顏去春拋綠酒歸孤身類蓬轉老眼看花飛愁
裏成新咏閒中簡舊非丁寧初夏雨好長故山薇

程敏政

秦廷韶太守及九龍山樵陸懋成請遊惠山遂
酌第二泉飲聽松菴次少師姚廣孝留題舊韻
江雨吹風過山門向晚開汲瓶分水去騎馬聽松來老

鶴驚人起新篁夾路裁多君憐別意隨處送春杯

過高郵湖

曉發孟城驛人家過淺塘日華初耀水風力正開洋竹
纜收蛇蛻蒲帆列雁行客心還自喜今夕到淮陽

遊萬山觀

何代迎仙地高低復起樓東明先得日西爽最宜秋帆
影林梢見嵐光脚下流道人吹鐵笛飛思遙瀛洲

宿資勝寺與王文嶼進士夜談

載酒朝相過論心夜未中卧殘禪室冷談徹講堂空香
篆銷輕縷燈花落小紅好懷攏不盡鐘起院牆東

莊果

憶舍弟

天邊聞一雁杳杳向南徂今夜西風冷他鄉小弟孤五
人千里去九月一書無欲作千行淚憑誰寄客途

章懋

遊牛首山和沈仲律韻

乘興來山寺清尊共解顏院深春晝永香裊午風閒短
屐行應遍危欄倦亦攀白雲飛不定何處是鄉關

張弼

耕隱

幽僻隱人居田園一頃餘競耕春暖後酣睡晚涼初稅
薄食常足時清身自舒兒曹樵牧暇還課數行書

秋思

白露籬間響殘螢是處流朝朝上樓望日日使人愁未

遇梅花使空題桐葉秋殷勤報明月為我照西州

張弘至

寄唐飭軒

不見逾三月江城趣若何吳歌秧馬歇荆俗艾人多籬落依青澗琴書對碧蘿秋風歸故里短棹候相遇

李傑

題謝廷循山水

峯高遲出日山氣曉氤氳葉潤林藏霧崖分谷吐雲客

衣晴亦濕濕響遠逾聞茅屋依深樾逃虛羨隱君

戴縉

楚江旅懷

薄暮過瀟湘秋空楚水長黃蘆千里月紅葉萬山霜客
夢懸雙闕鄉心逐五羊羈情誰與語勞者若為傷

樊阜

馮公嶺道中書所見

馮公今去久嶺路至今聞紅樹村村雨青山片片雲野

橋松板架巖溜竹筒分日落人行少時參鹿豕羣

過故人莊

山村行處好偶過故人莊秋竹烟籠色寒花露浥香一
雞鳴矮屋雙鷺落橫塘留飲忘歸去陶然入醉鄉

遊黃龍寺

古寺青山上登臨見遠村樓虛堆竹粉崖剝露松根晚
逕雲生潤秋池漲落痕高僧宣梵偈趺坐到黃昏

靈峯嶺道中

嶺路青林杪盤迥出亂雲寺樓當塢見野碓隔溪聞屐
潤苔花積衣香藥草熏崖陰仙洞在遙見鹿成羣

遊靈峯寺

步入靈峯寺嵐霏翠濕衣野塘蒲葉短石磴鮮花微潭
靜龍長卧山寒鶴未歸老僧茶話久高閣轉斜暉

吳寬

次韻時暘對雨喜晴

颯颯復霏霏清晨坐掩扉短籬垂豆角破壁上苔衣潤

覺琴聲緩涼驚酒力微客樓詩句滿未許沈郎肥

送王合州

南出都門去逢人問合州一官為別駕萬里付扁舟巫
峽流泉曉峩眉半月秋緣知蜀道易隨處有詩留

文林

宿青陽驛

市冷人家靜途長客思增夜潮舟浸月寒渡水流冰破
驛沈高岸疎林見遠燈空囊寒食近瀚海一浮僧

靜海驛

深夜驛途靜長河瀚海通舟明沈水月燈暗落潮風暝色浮煙外春光欲雨中年年苦行役踪跡任飄蓬

金華道中憶君謙

遠別輕千里經行歷萬山思君終夕坐出守幾時還堤柳吹花盡溪雲過雨間南峯著書處夢裏更躋攀

溪行

窈窕入回溪春深花片稀絕灘魚逆上掠草蕪低飛雲

飲樹初出水窮山復圍仙源不知處獨棹小船歸

夜經武城

古之武城在魯地今東昌武城非舊跡也

春光過二月草色刺芳洲雨濕雲低罨風微水靜流亂
雲屯往路垂柳颭行舟聞道武城近悲笳出戍樓

楊榮

江西旅懷

客夢家千里鄉心柳萬條片雲遮海嶠一雨送江潮戀
闕綿袍在懷人尺素遙春光看又晚何處灞陵橋

宿武陽川

天外鳥歸盡川原月上初落花孤嶼寂殘燭短蓬虛異
語聞商稅長歌識夜漁因悲湖海迹已是十年餘

馬中錫

送冀文華郎中弟文緒偕其姪還淮南

為客異南國還家下北州大馮才共被小阮又同舟回
首鶯花暮驚心免麥秋可堪圖畫裏池草重添愁

高橋題河西道壁

塞垣風景惡。况屬杪秋時。野闊人行少。沙深馬去遲。狂
飈鳴獨樹。寒燒入荒陂。試問晨征者。憂來鬚幾絲。

得雨

曉風清枕簟。夜雨溢陂塘。庭草增新色。園花洗舊妝。酒
尊涼更綠。書卷濕猶黃。誰道門前客。衝泥去路長。

林俊

別鄉人

驛路迷蕪浦。官梅動越吟。相看今日意。同是故鄉心。鶴

徑寒沙口漁船綠柳陰滄洲有奇事未老欲抽簪

送方上舍

客路阻風沙離心逼歲華潮平今夜月梅作去年花囊
澀書還購天寒酒待賒席珍逢聖主未許卧烟霞

有題

山崦雲猶暮江天雨欲晴院深芳草合日落野舟橫古
路稀人跡青林但鳥聲春風期載酒相對面柴荆

陳桂

次毛叅將秋日江居

雲淨羣峯出江空一鳥遲雨前蘿補屋霜後菊編籬巢
燕非新主沙鷗是故知考槃人自取天地豈吾私

趙寬

南昌城下夜泊

片月流平瀨孤煙沒遠汀鳥棲城柝起人醉棹歌停山
水滕王閣乾坤孺子亭登臨阻日暮幽興遶林坰

自奉化至西店春意滿目驛亭桃李盛開獨坐

成咏

四山圍野色百鳥弄春聲繡幕連天闊紅茵疊地平十分春已半一雨曉初晴對此徘徊久東風惱客情

和匏菴先生園成

拓地開茅塞翛然五畝園旋裁新竹樹還立小亭軒沃壤含生意危牆見補痕尋詩雙屐遍斜月下柴門

王敬

登浮碧樓

山閣凌空起孤雲挾雨飛好花臨驛路小艇占漁磯石
磴斜通郭煙村半掩扉主人留客意薄暮肯言歸

邵寶

麻姑山次萬長史韻

亭依青嶂曲路出綠蘿間泉聽雲中珮峯看霧裏鬟風
烟初曠遠花鳥各幽閒落盡西林日遊人始擬還

秋野用杜韻

河漢三秋隔星辰萬里違客憐雙鳥去僧訝一人歸相

馬吾何有知魚爾亦非春風故相愛吹綠北山薇

漸霽

漸霽驅愁思無風稻正花徑來今雨客烟起野人家晚
榻將新月秋溪有淨沙東鄰知我興多事報山華

喬宇

送甕山偶遇潘南屏

朝日散林薄鐘聲出翠微青山面湖立白鳥背人飛勝
地不常有幽期能久違會逢高士話相對欲忘歸

儲巏

彭城有懷

清夜棹歌發高秋客思生綿綿鄉國夢歷歷水雲程老
樹危蟠石衝波怒噙城白門樓上月偏傍海東明

春晦連日風雨贈別

病較芳時晚春含晦日陰曉鐘人不寐舊雨客難尋院
濕蛛絲重庭虛鳥跡深平明添好况移竹滿西林

殘春猶兩日欲去且相留脉脉難為別息息可自由天

涯芳草路花夕夕陽樓誰道丈園客新來賦倦遊

懷舊何處觀燈好

何處觀燈好分曹建業年春星低觀闕晴雪映山川鄰
曲筵長接城隅騎每聯憶同江水部終夕咏紅蓮

何處觀燈好臺城並騎時酒邊看夜戲花下聽春詞火
樹璇霄發松棚綵市移遲遲南陌上明月鎮相隨

何處觀燈好琳宮禁籞西星橋通碧落雲綱綴丹梯梅
畔春猶寂松梢月漸低傳柑誰得句痛飲憶宣溪

王世賞號

宣溪是夕予同希大

邦亮飲朝天宮西院

何處觀燈好風光帝里多鯀屏圍寶炬鼇駕灑金荷列
第珠垂箔長橋竦枕河誰家吹鍊笛月午更相過

良鄉察院夜次壁間韻

不眠疑漏盡獨坐愛燈明好夜春連市微風月滿城凝
香清燕寢落筆得蠶聲無限懷人意迢迢到玉京

有懷

獨坐誰為伴清謠夜不眠懷人千里共看月幾回圓秦

塞連雲戍荆門下峽船歸程那可料依舊折津年

楊循吉

殘雪

殘雪經時久常聞簷溜聲謂晴階又濕疑雨日還明地
背融偏後宵寒凍復成不妨留莫泮借爾照書檻

石玷

寄北覺隆上人

水北多僧寺生公院最幽地高平受月林密靜宜秋梵

語中天應鐘聲下界浮文園多病客回首欲淹留

遊北寺亨上人後園

偶為尋詩出穠華觸眼新鳥歌行酒地花覆倚闌人風
籟渾無譜蟲書太逼真絕勝絃管夜紅袖舞香塵

宿性公院

清齋夜無寐星月耿前除野客尋詩罷高僧入定初欲
來還去夢纔讀又忘書豈為悲華髮聰明漸不如

新雪

雪意已崇朝凌風葉漸飄著衣初點點入竹故蕭蕭翠
壁誰凝望青帘久費招期君坐今夕燒燭看瓊瑤

東昌答鄭侍御

勞君相問訊別意正茫茫魯國風何古吳山路正長水
平舟去穩春暖雁飛忙安得乘驄使追隨達建康

雨後奉憶家兄

小雪還逢雨晴窓漸覺寒南來風土異北寄雁魚難晚
稻垂霜穗殘荷捧露盤塞門今夜月禁冷立危欄

楊廉

折桂寺

境豈浮屠勝東南秀此峯澗流千丈瀑崖長萬年松少室留蒼鹿喬君見小龍布鞶從此製雲嶠寄遐踪

羅玘

送張元興歸鉛山

雁落雲低樹馬嘶風颶沙君今作行客吾敢詫詩家內史忙歸院兵曹早退衙殷勤一尊酒明日是天涯

送曹進士知貴池

到江真幾里為縣可三年心自難忘蜀官還只住燕鶯
花繁別酒楊柳夾行船向日登瀛客相期禁籞邊

李堂

董山莊雜咏

紅葉亂紛紛秋光到小村莫憐蒲柳脆幸與菊松存緩
狹貪山果牛羊戀單門石牀涼不寐流水激籬根

夏鍇

巾山

雙峯遙濕處少頃雨聲稠野鼠行詩卷山禽掠酒籌
海天先得暮江月只宜秋一笛誰家發隨風到上頭

周旋

暮春

斜陽含霽景江上去人稀垂老猶為客經冬未授衣僧
鐘和月起漁火隔烟微故國雲霄外多從夢裏歸

楊子器

早朝

禁門開始入城觀
迥難攀仗馬矜驂
乘宮鴉學捲班曙
雲藏壯斗晴雪見
西山肅穆鑪烟外
珊瑚響珮環

文森

九日

三載重陽菊開時
不在家何期今日酒
忽對故園花野曠
雲連樹天寒雁聚沙
登臨無限意何處望
京華

傅珪

大寧僧舍

村外重關護原頭怪石蹲水聲來樹杪花影上山根寺
古殘碑蝕僧貧破衲存俗塵銷不得何用訪柴門

李承箕

次韻石翁寄容一之圭峯

清秋望不極楚客思無邊得句雲歸岫開尊月上絃坐
平臨海石飲足在山泉歸面垂厓壁土從頭又幾年

高與清

望瀑懷友

瀑布鍊城落晴看似白雲從來潭水怒只有野猿聞人
隔三山遠鄉因一嶺分安能乘霽色策杖一尋君

沈周

十二日還自光福道中即事

兩竿西下日吾棹正東歸溪老過橋去野禽穿樹飛水
將人眼淨葉與鬚毛稀納納乾坤內秋風自布衣

元旦後一日劉德儀送酒

使者雙瓶至蓬門向晚開停肩慰泥滑解幕省香來染
指憐佳味挑燈引細杯明朝攜小榼江上候新梅

史鑑

飲烏步顧氏村居有作

去郭逾千步淳風自一鄉日斜魚市集歲久水祠荒草
色遙連渚花枝半出牆西南山更好欲渡苦無梁

送嚴宗誠還金陵

相逢俱在客相送各還家聚散猶萍水登臨總物華鳥

啼新霽曉風折未開花明日丹陽道輕雷隱去車

過橫塘

西向橫塘過風涼天又晴兩山沿路轉一舸問津行野
水飛雲渡斜陽去鳥明采蓮人不見遙聽唱歌聲

至通州

絕域經遊少重關啓閉嚴官租兼菽粟民業盡魚鹽海
氣朝成市潮聲夜入檐狼山渺何許空翠遠浮尖

姚丞

題畫

白雁啼荒渚蒼涼露未收潮聲驚野客曙色動孤舟霜葉如花好溪雲似水流無端鄉思切一上海邊樓

崔徵

春江送別

頭白猶為客辭家是幾年離筵臨野水歸路入江烟鳥度青山外帆開暮雨前春波與春草悵望一淒然

渡口

落日滄波闊西風木葉稀沙頭人語雜烟際櫓聲微燈
火誰家起漁樵幾處歸臨岐笑揚子何事淚沾衣

張鉞

歲杪思親

強對青燈酒遙瞻白髮親愁深知有夜客久似無春短
燭千山夢虛舟萬里身梅花東閣外又向故園新

鄭廷

雨中次彥超韻

對雨愁無那時局白板扉驚看塵鬢改坐使壯心違有
客傳械素何人問布衣思君不得見心逐白雲飛

陸堇

贈別秉智

已富三冬學青衫稱少年遠尋東老寫獨羨外甥賢雪
變寒江雨鐘鳴野寺天又驅羸馬去離思遶長川

葉聰

呂梁洪

西風將客棹飛度呂梁洪地迴雲垂野天低雪滿蓬山
從豐沛下水向泗淮通疏鑿誠非易懷哉大禹功

陳文

宿遷

古邑臨河水昏鴉噪縣門四方爭集市三戶自成村禾
黍秋風隴牛羊落日原客愁千萬種辛苦向誰論

方太古

隨處

隨處自丘園無心計子孫江清平見寺山小遠連村野
况家常飯真情故舊尊興來惟嗜酒意到已忘言

簡良通

幽人秋雨後懶出鳳山門藜杖空雲氣葛巾多雨痕輪
蹄悲市井水石夢江村白酒還君醉陶然卧竹根

程玄輔

雪後次吳江

北風吹短日孤棹倚松陵城郭留殘雪江流走斷冰新

詩歌自慰好夢笑無憑故舊吳山下山陰興欲乘

朱朴

靈隱寺

合澗橋頭水飛來洞口山鳥盤蒼壁影僧掩翠微
閑松露晝還滴巖花秋更斑一年常一到一到一忘還

謝復

暮春懷本厚讀書西峯寺

雨水連三月風光又一年桃花餘滿地柳葉漸迷烟幢

影翻燈外鐘聲落枕邊懷君讀書處寂寞伴寒蟬

春日偶成

二月春光好村村景物綠垂烟外柳紅綻雨中花倚
杖登危嶠提壺坐淺沙耦耕今有伴隨處可為家

祝允明

漢闕

漢闕咸陽建山河百二開甘泉芝草出天馬大宛來宣
室宵衣問長楊獻賦回寧知天祿閣不用子雲才

秋晚由震澤松陵入嘉禾道中作

晚發西南郭秋深雨氣偏人家低似岸湖水大於天日
崦長如閣風檣不用牽辭燕還入越纔費半流年

湖尾橫波急船頭轉港頻幾家危傍水一木老存身黃
菊看如客青山坐送人空舟隨處泊不用擇行鄰

友人郊墅

孤墅倚高原扁舟晚到門琴聲虛草閣月色滿江村霜
落魚蝦出烟收花竹繁不須燈下坐臨水好開尊

題湯三城南莊子

嘉樹夾茅堂城南十畝莊竹窓遙列岫花樹密圍牆免捷且施路魚肥笱在梁每來無世事祇覺道心長

隱者

白石辟蘿房青山雲水鄉琴傳雷氏斲書是汲丘藏鹿友同無我蜂分亦讓王枕中藏雅道一卧即羲皇

徐威

九月一日遊懸鼓崖

秋風懸鼓下烟火兩三家曲折通崖徑蕭條倚樹花蛩聲如互答人語半聲牙酒盡青山暮歸鴻背落霞

顧清

涯翁示獨酌二詩序云是日飲松江酒次韻奉
謝

城闕非長住山林是夙期時開問字酒不膩解嘲詩綠
樹停觴久紅闌點筆遲奚童斟酌憒深淺自能知

左掖文書靜西亭竹樹幽幾時能獨醉此日是真休地

遠陶潛社人懷庾亮樓賞音知有在誰復步兵求

送謝司倉

寧知信宜邑乃在古高州地接朱鷺近天連碧海浮官
倉餘大米土俗罷綿乘莫作炎蒸慮男兒重遠遊

鄭岳

野望

病告捐微祿官閒帶舊銜提攜惟藥裹嬾漫廢書緘海
闊浮孤嶼天空挂一帆吟眸隨處著秋色滿衣衫

吳一鵬

過李海務

海國茫茫裏輕帆整復斜楊花低度水萍葉細黏沙魚米三家市風烟一樹鴉不須嗟落寞吾意本天涯

陸相

寶應道中

百里平湖水輕帆次第過魚蝦攢曉市鷗鷺浴寒波霧塔籠鬟髻秋花艷綺羅十年淮海夢愁絕竟如何

杭淮

送徐石東僉憲湖南分韻得瀟湘

瀟湘他日夢今上合江亭天闊浮吳楚山青入洞庭鷓
鴣春渺渺斑竹雨冥冥舟檝雲中見依稀帝子靈

山水小畫和韻

金碧披毫末江山入座中橋分沙岸水樹繞石林風已
覺滄洲遠還疑玄圃通生綃僅盈尺萬里對無窮

雨中登樓

節序黃梅候朝陰午不開浮雲暗山去急雨灑城來高
艷紅葵濕低翔白鷺迴洗心亭咫尺烟霧擁層臺

許讚

初入棧道

梁漢起天中形連百二雄萬山爭地立一路與天通樹
杪過人影崖頭嘯虎風我行三月暮悵望華陰東

黃沙驛

迤邐黃沙路郵亭草午開簷花新濯雨石筍亂穿苔風

氣通巴蜀鄉音異隴邵潺湲漢江水客思共徘徊

劉麟

南坦讀書臺

盡洗侵輿竹來聽轉壑泉萬花齊映谷五柳欲飛綿弱
子將迎婦鄰翁許借錢讀書臺下雨種玉比藍田

陶詣

晚宿峽口

迢遞羣山合逶迤一徑通半村無夕照空谷自天風轍

飛嵒岝上年衰道路中客懷增闌寂新月翳疏桐

劉玉

回龍驛

牽路繞村斜舟行聽早鴉負囊趨遠渡提甕立平沙日出雲生葉風回浪起花太行天際碧吾亦憶吾家

歸途

晚晴回玉勒歸路擁瓊花紫霧蒸山氣清輝蕩日華削波冰挂壁髡樹凍凝槎勞役何須問窮生更可嗟

黃衷

雨

自從人日雨漠漠，決旬連漸綠。磯頭草仍迷夏口，船雷
聲喧浦近農事惱。時先楊柳東門色，春寒幾度眠。

陳霽

過楊二郊居

白石芳郊路，清谿舊竹扉。橋通湖水近，樹入隴雲微。蘋
葉漂波冷，鱸魚上釣肥。村醪沽不遠，落景未言歸。

熊卓

和何仲默遊靈濟宮韻

乍識花源路瀟然世外居玉壇秋雨冷紫閣晝陰虛餐
玉傳奇訣抄方檢異書却憐城市客羈束未能疎

散步

憩馬野田外萋迷碧草原雞鳴巖下寺犬吠洞中村遠
水遙空色殘陽過雨痕野情雲共逸中歲向林園

送王衍之還陝和廷實韻

擾擾郊門道沙寒驛路微
烟花行客晚京洛故人稀
野岫孤雲沒春山獨鳥歸秦川
隱關塞一望一沾衣

戴銑

武城晚眺

野望蒼烟合城昏白日斜
暮隄千樹柳胥郭萬人家
小舫明漁火高樓隱暮笳
寂寥江上立羈思滿天涯

朱諫

清明日泊揚子江

楊柳夾江青東風潮正平雲間旋蜃市沙際聽鼈更萬
水俱東逝孤舟更北征不知時序改今日是清明

入清河

柳葉初凝綠桃花正滿林河流移故道海色變層陰午
夜一帆月征人萬里心風沙吹欲老短髮不勝簪

寓江心寺

孤嶼清秋夜星河萬里查江山如有約雲水暫為家白
髮隨鷗鳥輕舟采石華秋風動歸思漸瀝響蒹葭

唐寅

題畫

鞋襪東城路清和四月時遊姬香滿袖明月水平池
畫燭留鶯市酸風颭酒旗少年行樂地不許衆人知

王守仁

古道

古道當長坂肩輿入暮天蒼茫聞驛鼓冷落見炊烟凍
燭寒無談泥爐濕未然正思江檻外閒却釣魚船

謝廷柱

夜泊石門

斜陽阜林驛暗月石門橋雨暴桑難葉烟輕柳未條客懷空耿耿春事竟寥寥今夜舟中夢閩山翠欲漂

宿永峯不果踰十里改宿桐林

數程過百里天色已黃昏客問溪頭館農歸樹裏村雞豚各離落煙火幾柴門乘夜求安枕桐林更上原

周用

靜觀

地偏心更遠卧起了無譁養拙存吾道流年感物華讀書餘左氏看竹但西家數點朝來雨新開木槿花

秀峯

絕憐湖上水照見佛頭青到處通三竺移來得巨靈雲
心回玉柱霞氣薄金庭放鶴人歸去猶懷舊草亭

宴別有贈

城南迴小宴涼雨客臨秋水白蓮花淨雲陰桂葉稠此

時懷故國有日問歸舟月色清淮夜孤吟更倚樓

魯鐸

西江別業贈同遊曾廷哲

清秋遊別墅小艇溯西江水落洲全出霜來葉預降汀
漁入野鷺風笛度村腔最荷鄰莊叟追陪載玉缸

閒居

別墅仍書屋閒居興頗奇野山爭入座田水暗通池鳥
語花深處魚遊月上時坐闌還散步聊復有新詩

立春

此日春初至南荒暖氣偏野田將秀稻谿樹已鳴蟬軒
蓋晴交繖余裯夜褪綿故鄉清夢裏冰雪滿山川

坡壘道中

坡壘村西路新春興味嘉雨鳴將解籜風裏半開花山
色青螺潤溪紋翠簾斜題詩記踪跡回首欲成嗟

徐問

夜發蕭灘

驛小臨官道沙長帶水城山於雲處沒星過渡頭明瑣
瑣非初志營營既此生壯堂凝望遠秋日萬重情

早發烟渚

雨色江頭樹青烟夾路長遠村回寂寞白鳥去微茫楚
客歸何日春江正可航因思雲嶠句心折不成章

何瑭

歸雁次孟望之韻

何處堪惆悵歸鴻嘹唳音關山千里約光景四時心影

入春風靜聲傳畫閣深冥冥霄漢上羅網莫相尋

葉相

史江臯約遊芙蓉莊阻雨

細雨芙蓉徑衝泥客到稀橋分平野潤江入曲池微花
怯寒輕隨鶯愁濕不飛高雲掩片月容易送君歸

王尚絅

贈李解元

易水蕭颼處秋風聽短吟雲來村樹暝蟲響豆花深舊

篋猶懸劍高齋已罷吟留君渾未得寂寞數年心

陸深

寶應夜泊

天接湖光迥雲開塔影圓老漁明宿火客子傍歸船晚
市風聲靜秋沙月色偏絕憐淨如練閒擬謝公篇

大浪灘

江水清不澈秋容雨復晴捲簾聞瀑坐欹枕看山行密
條緣溪轉長松徑壑平人家翠微裏時有白雲生

張邦奇

九日宿院

玉署逢重九
秋花傍苑牆
天涯來弟姪
客邸似家鄉
槁葉池魚響
深松海鶴藏
院虛宮漏永
趺坐月微茫

黃鞏

襄陽即事

斷岸移沙觜
江城倚漢濱
山光餘照日花艷
正逢春勝地
登臨遍東風
感慨新知舊
傳更有姓龐人

冬日書懷

獨立蒼茫裏悠悠一轉蓬風塵連歲儉湖海又途窮野
曠飛鶩急沙寒落雁空思君何處所斜日下簾櫳

孟洋

暮春後園

暇日西園內問春春欲歸雀驚看果落蝶嬾覺花稀
積水斜通徑遊絲暗著衣流光不可轉心事苦多違

烟

湘流落日外沙迴暮生烟杳杳千峯失霏霏萬壑連鵠
翻知浦樹人語辨江船暗裏猿聲斷愁深攬夜眠

訪龍洞

野情塵外愜秋思馬前生去雁迷山色懸藤落澗聲洞
空千樹響雲細一花明漸覺人踪絕烟霞近赤城

九日次邊青崖太常韻

落帽憐高興銜杯意轉哀葉辭霜後樹人上雨中臺為
客悲秋盡思鄉見雁來百年幾佳節又負菊花開

殷雲霄

虎丘寺

落日青山外浮雲蒼海邊江山皆勝跡樓閣自人天碧草生公塔丹崖陸羽泉平生獨往志欲老翠微顛

寄東昌梁劉二生

十日南風阻今朝始北風繫帆舟子喜沽酒故人同岸柳從渠綠山花也自紅吾鄉有佳樹聊復問春叢

張寬

大駕南郊

行殿彤雲合晴郊綵仗摺鑪煙香細細羽扇影團團禮樂從周典威儀盛漢官帝壇風露肅轉慮聖躬寒

早朝

曉日含青陛疎鐘散紫煙聞雞頻視夜騎馬獨朝天馳道千官肅梯航萬國先御爐香不斷長遶翠華邊

方獻夫

閒居和杜子美韻

問徑隨芳草支筇入五雲歸來陶靖節多病沈休文花氣單衣稱松陰小簾分悠然天地別白日絕塵紛

嚴嵩

奉命視牲

觀闕層城峻郊宮複道開市烟當樹合炬火逐塵來帖犧人報騶聲騎士催夜歸題笏記候曉奉蓬萊

全州歲夜

殊俗聊相值空堂誰與同燈明深雪裏歲盡漏聲中野

暗孤城柝庭高古樹風頻年遠為客此夕意何窮

金山

寺擁金山古江流碧海深千年此形勝詞客幾登臨波
浪浮香閣魚龍聽梵音晨風渡舟楫真有濟川心

盧溪謁周元公祠

古鎮無監稅高賢有奉祠位卑名德重世遠士民思風
月盧溪迴衣冠宋代遺停驂肅瞻拜敢惜去程遲

李夢陽

郊觀齋居東邊喬二太常

人日過仙院春霞渺渺分碧回瑤澤草紅綻慈宮雲獨處依松樹清齋對鶴羣桃源知並入惆悵不逢君

西天門候祀

瑤壇暮雪盡月出禁門西地靜鳴珂碎沙寒簇仗低臺官移斗柄衛士掃雲梯遙識龍文氣爭傳法駕齊

得何子過湖南消息

及遇荆門信洞庭秋已淒湘江饒苦竹幾聽鷓鴣啼馬

援留銅柱王褒祀碧雞向南衝瘴癘藥物去曾攜

寄王子蘇州

獨立望南天秋空月會圓此時一樽酒憶爾隔蟬娟並
馬遊燕日孤舟去越年斷腸今萬里心折暮江前

送王子如淞江

寶劍寒無色蒼然海上行異書探戰伐高論動公卿何
日為毛遂前身是賈生誰憐同學子章句得虛名

芝山

吳楚分何代乾坤此郡孤江從樹裏斷山入雨中無戰鬪名空在英雄世與徂酒酣撫長劍極目盡重湖

酬京師友人見寄作

浮雲悲故國積水起鳴雷不見長安日愁登古吹臺故人三月別天上一書來欲問經行處山中杜若開

東坡秋泛

久說東坡好今陪上客遊綺筵開畫舫哀笛奮中流舞每低輕燕歌先起白鷗稍前休更進吾愛荻花洲

送田生讀書上方寺

嗜靜甘違俗藏脩合就僧緣移開逕竹寒掃護窓藤殿閣秋陰下琴書爽氣增不須匡氏壁常有玉蓮燈涼雨滿庭戶冷然松桂幽隔雲清磬濕向夜一燈留螢火輝書幌鳥啼上佛樓諒多今古意先著宋春秋

銀山寺

銀山倚鐵壁天外削三峯不見林中寺來聞午後鐘僧徒住石屋雷雨拔門松西望諸陵接雲成五色龍

南陽宅訪徐禍卿

東閣能留第
南人暫亦居
琴書遷卧內
騎馬到尚除殘
樹喧巢鵠
微風走壁魚追思
秉釣日冠蓋
爛盆問

河上秋興

古有蒹葭客吾今
水一方茅齋寒漒漒
洲渚鬱蒼蒼
獵捎河雁歸人競
野航霜高木葉下
莫擬是瀟湘
坐送登臨目晴空
鳥路長秋雲不近
苑宮柳自成行河
洛來天地人烟接
渺茫采蘭空澤裏
彼美在何鄉

日上秋林淨江清旅思微黃花雨後積白酒客來稀今
古三川地乾坤一布衣獨行吟望苦沙鳥背人飛

名城急鼓吹野處散秋烟衆草莽零落孤松羞自妍山
川亂明水雲日媚高天何事楊朱子臨岐獨泣然

後代看今代今人即古人空傳歌舞地不見綺羅春宋
嶽饒寒草梁臺起暮塵蒼茫白鷺渚瀟灑類閒身

白馬瓠子口秋風汾上歌帝鄉不可見千載白雲夕夕樹
動江帆至雲前塞雁過滄洲無盡極慷慨有漁蓑

一為梁地客怨及授衣天野靜寒烟白沙鳴暮雨懸飛龍過絕浦立馬看長川望望蘋花盡鷗行若箇邊

積雨催搖落江村菊自秋驚風振大壑失雁下寒流暗水斜穿竹孤雲晚抱樓虞卿足簡帙白首傲公侯

何景明

沅水驛

小驛孤城外陰森草樹幽晚涼憑水榭秋雨坐江樓絕域鴻難到空山客獨愁夜深歸渡少漁火照汀舟

去國日以遠登樓思故鄉雨來江氣白日出市烟黃島嶼秋逾淨軒窓晚更涼憑高凝佇久槐影下微陽

辰溪縣

早發辰溪渡清川喜泛舟山城欹粉堞江驛映朱樓雨驟沙頽岸天寒水露洲蘷音聞漸異迢遞動鄉愁

平溪

徙倚平溪館天高秋氣清水螢光不定山籟響難平夜火雲間戍寒楓江上城終宵無夢寐高枕聽灘聲

雨夜似清溪

院靜聞疎雨林高納遠風秋聲連蟋蟀寒色上梧桐短
榻孤燈裏清笳萬井中天涯未歸客此夜憶江東

客至

野外逢迎少柴門落葉稠人閒不掃室客到始梳頭且
為烹茶坐還因看竹留登臨如有興更上水邊樓

月

片月中秋近輝光一歲無天清驚塞雁夜冷落楓烏不

寐知宵永無言對影孤更深何處沒萬里隨江湖

殿試宿禮部和馬張二光祿喬直閣諸公

東閣春朝晚南宮夜宿深銷闌猶月色開閣更松陰地
迴神仙接天低象緯臨諸君清廟作三歎有餘音

清溪草堂

并序

錄二首

沈子高吳人也構草堂於清溪之上以為隱居焉
今年北遊至申來訪予道清溪之勝遂為作詩四

首

草閣臨溪上，幽期孰與論。
白沙連野岸，秋水到閒門檻。
外常垂釣舟中數舉樽，
風情有如此，不異浣花村。

隱者常稀澗幽居，獨羨君汀洲。
起漁唱離落傍鷗，羣水接吳門。
樹窓生雨洞雲更傳詩句好，還似沈休文。

懷高鐵溪先生

積雨空林畔，庭除烟霧昏。
佳人不我至尊酒，向誰論野樹。
斜連屋秋山，遙對門何時。
孤興發騎馬到荒村。

西郊秋興

野屋清秋暮寒沙易朔風歲年悲老樹岐路感孤蓬醉
豈逃名士狂非避世翁尋常門自掩無客到山中

舊家滌水上門向釣臺邊近市來沽酒中流坐放船蒹
葭開晚照洲渚接寒天漁父如相識長歌過我前

亭古楓杉落緣溪不待秋西風怯纖綺細雨戀重裯雙
鷺寒窺井孤鴻晚過樓白鷗還有意相逐向吾洲

嚴風日以發落葉轉紛紛遠樹斜銜照寒山半入雲步
兵常嗜酒水部本能文悵望千秋上斯人亦不羣

懷沈子

沈生南國去別我獨悽然落日清江樹歸人何處船十年安陸舍數口太湖田想到鄉園日生涯亦可憐

十四夜

水際浮雲起孤城日暮陰萬山秋葉下獨坐一燈深白露蒹葭落西風蟋蟀吟關山今夜月橫笛有哀音

九日夜過劉以正別士奇

重陽愁獨酌深夜喜相過萬里惟秦客三杯亦楚歌霜

笳沈海月風雁起滹沱醉別黃花去能忘白玉珂

送柴先生

迢遞京華路憐君歲暮行一尊淮水上疋馬楚王城白首家無定黃金藥未成蓬瀛如可涉約爾共逃名

季夏辭燕地經冬滯汝濱孤城一相送歧路不勝悲為客江湖遠求仙歲月遲世途來不易相見更何時

雨中過李真人方丈

勝地豈常得幽盟難重尋清晨驅馬出聊此息塵心鳴

磬秋堂濕燃燈古殿深吹簫愛仙侶縹渺隔珠林
層臺暮雲外寂寂羽人居積雨堦除淨含風殿閣虛洞
中留白日窓下寫丹書即此觀幽逸能令世慮疎

雁

嚦嚦清笳怨飄飄南雁翔長風度關塞九月下瀟湘積
水浮連影遙空起斷行故園秋望盡聞爾淚沾裳

立秋寄獻吉

山城一葉下水榭已迎秋夜迴霜風至天空大火流稍

蘇司馬病翻遣宋生愁日暮關河外思君重倚樓

送楊太常歸省

聞道西南寇猶多虎豹羣過秦應有論諭蜀可無文未
返巴山使空懸棧道軍煩將父老意歸報聖明君

登五丈原謁武侯廟

風日高原暮松杉古廟陰三分扶漢業萬里出師心星
落營空在雲橫陣已沈千秋一瞻眺梁父為誰吟

汝慶宅紅菊

紅菊開時暮亭亭冠物華亦知顏色好不是艷陽花羅
綺嬌秋日樓臺媚晚霞清香如不改常傍美人家

與孫戴張三子納涼

薄暮攜三子追涼步短宵水邊低出月樓上忽橫簫久
露花沾濕微風竹動搖醉歌聊永夕坐待紫宸朝

出閣過勤甫省中

梧垣通左掖花省接仙郎並坐停杯晚高談卷幔涼水
陰沈紺殿山影落雕牆愧我同朝客傳君寡和章

城東泛舟

水郭移尊宴沙原，列騎停岸開平放。
舸林轉曲通亭雨，意雲垂白風情柳。
送青衣冠夕臨泛，東望極滄溟。

中秋無月

今年罷高樓，獨客愁關山。
中夜笛江漢，故鄉舟暗雨。
捎簷入秋螢，度檻流應知。
雲霧上天柱，有人遊。

御選明詩卷五十四

總校官庶吉士臣侍朝
校對官檢討臣蕭九成
謄錄監生臣李本



欽定四庫全書叢要

集部

御選明詩卷五十五

詳校官原任主事臣李斯咏

欽定四庫全書薈要卷一萬八千五百五十五

御選明詩卷五十五

五言律詩六

徐禎卿

登支硎山樓遲遊侶

谷寺憐幽密茲樓表麗觀烟雲連壑動竹樹入門寒獨
往迷前徑憑高遲所歡時聞有清磬遙出暮林端

送許補之還丹徒

憐君揮手去匹馬向南天旅病青山外鄉心落日懸燕
闕變積雪淮柳動新煙驛路重雲裏相思易隔年

駕出南郊退簡邊喬二太常

齊殿鑾輿下郊宮鳳野開霜戈迎日動芝蓋拂雲來輦
道前旌直鈞陳翼騎迴甘泉枚朔侍詞賦接仙才

秋日懷李郎中及邊熊二子

秋興因高賦雄才憶省郎山川思不極雲樹莽蒼蒼對
酒知時變看花感別長如何霜後雁猶未達瀟湘

月

故園今夜月迢遞向人明只自懸清漢那知隔鳳城氣
兼風露發光逼曙鳥驚何事江山外能催白髮生

彭蠡

茫茫彭蠡口隱隱鄱陽岑地涌三辰動江連九派深揚
舲武昌客發興豫章吟不見垂綸叟煙波空我心

在武昌作

以桑梓念淒其江漢情不知天外雁何事樂南征

吳舍人園亭

新年風景地休沐竹林人魚藻含泉動楊園聽鳥新夕
陰連九陌喬木俯千鄰虛負高陽興多慙酩酊身

過禁雲精舍

遠師耽晏寂趺坐石牀深留客開香積談玄就竹林烟
藤結暝翠雲磬下空音淨現青蓮色懸知出世心

月

落日桃源口迢迢望楚邦烟霏靜夜色棹響繞空江看
月生西浦穿雲度北窓高樓有羈羽照影不成雙

逢錢水部

仙侶維舟處蘆花曉浪生疎煙過柳色細雨出鶯聲邈
我冥心契重君攜手情蕭條尊酒盡芳草又孤征

贈羅浮山人

聞有羅浮客臨流眠白雲海峯帆外接江影樹中分蘿
戶春常閉林香晝自焚月明巖畔石遙禮大茅君

酬東卿留別

別意涼風發開尊細雨寒王程逢楚盡明月渡淮看歸客
詢松菊騷人憶慈蘭詩名吾不及江漢一南冠

途次

洪津春渺渺落日水沄沄路合原前樹舟移沙上雲芳
蘋淨渚色絅帙對鷗羣坐覺海潮滿煙波愁向君

秋日懷李郎中及邊廷實

昨日逢京使聞渠再轉郎未妨文字癖祇益簿書忙退

食遲官旭鳴鐘候省堂祗應騎瘦馬緩轡漫成章

送友

送子胡為別南中建節行江虛星斗動月落海潮平蘭
杜通幽夢風煙接去程懸知有高興留滯岳陽城

邊貢

送都玄敬

才高憐晚達十載尚為郎書冒黃金盡愁生白髮長夏
曹分武庫秋殿別文昌木脫霜臯冷何人共采芳

驅馬別君處秋陰當暮生林柯無靜葉江雁有歸聲綠
水闊門道青山建業城未能同理楫延佇獨含情

春日卧病寄劉希尹王孟宣

老病東山客青春意颯然祇因愁不去翻與醉相牽草
檄懷公幹登樓憶仲宣幾時蓮葉裏重放壯湖船

泛湖

此日秋風起移舟向浦烟客心隨地遠人語隔花傳古
寺疎林外孤亭落照前十年塵土夢回首一茫然

趙麗卿易史座留別限韻

聽雨罷彈碁蒼茫生遠思遙應白門柳飄蕩綠烟絲旅
跡江花笑歸心海燕知倚酣方戀別休誦渭城詩

出郭將訪希準郡伯懼暮而返却寄

駕言江口出却至水西還遠道空回首重門欲上關斷
雲低白雁斜日近青山欲採瑤華贈仙舟不可攀

和答胡可泉郡伯

籍籍胡安慶新聲滿舊都詎知金馬客翻領玉麟符退

食還經史登樓即畫圖昔賢憂樂地元只在江湖

康海

許西夜歸

暝色暗川原籃輿返賈園野花迎夕露新月照秋軒醉
覽綸巾岸吟憐鳥語喧息息百年裏佳節幾扳援

二月十一日同德充弟憩許西觀杏花因共小

酌

出郭望精舍滿牆皆杏花香風當戶含艷影入林斜日

暖煙生玉春晴錦映霞興來呼酒坐不必問年華

陂頭

回首雙流細森疎萬木長遶溪浦粉落夾路稻花香所向皆殊絕平看却渺茫幾時同鄴叟伐竹構茅堂

江景

昔經涑湖水今憶武昌遊萬艇雲中下三江天際流漁歌蓮葉浦雁度夕陽樓應笑浮名客勞勞何日休

對客

絲竹憐吾嬪尊罍侍汝來片雲霄漢沒叢菊小籬開積雨難相過當歌莫謾迴請看秋草色黃滿建章臺

鹿苑懷太微

鹿苑何王殿明時尚賜秦芳林春礙日幽草晝眠磨畎
畝餘生計乾坤信此身西京誰欲賦韋曲有詞人

王九思

夏日樓居漫興

一榻高樓上蕭然野興存雀喧鄰樹晚雨暗寺鐘昏問

字兒能讀耽詩客共論吾生真可樂俯仰任乾坤

世泰容吾拙官閒似隱居苦吟遲得句倦讀卧看書山色
憑闌外花香退食餘老親身更健千里寄雙魚

秋夜

園亭堪避暑棲息忽經旬雨挾秋風至涼生夜氣新
締衾猶戀枕蟋蟀漸依人容易悲搖落天涯舊逐臣

獨坐

花林春晝寂獨生意蕭然園蝶浮暄景山禽下暝烟白

頭慵拭鏡濁酒不論錢自酌邀明月徘徊益可憐

晨起

晨起臨芳苑閒行玩物華社期來燕子春色到梨花地
僻柴扉靜亭深草徑斜桃源那復見今見墾人家

晴起

旭照浮虛牖清愁破老顏下牀梳白髮開戶見青山心
已寒鷗足身如野鶴閒杖藜尋舊侶同過碧溪灣

滸西莊春日行樂詞

金馬當朝彥銀魚隔歲焚高樓丹鳳麓閑卧碧山雲湘
瑟春風度秦箏月夜聞太平無一事只合醉朝醺

待月

避月樓何迴憑闌興起予目窮千里外月上二更餘素
影流銀漢清輝透綺疏聊將太白句把酒問蟾蜍

王廷相

郢城最高處眺荆楚

石城聊引望三楚渺茫間峽自中流闢江從西極還荆

襄天設險鄂岳水為關用武非今日風雲亦自閒

途中晦日

水落軒皇國天寒郭隗臺客程殘月盡歲事一花開雁向衡陽去雲從碣石來乾坤無定跡旅思若為裁

登臺

古人不可見還上古時臺九月悲風發三江候雁來浮雲通百粵寒日隱蓬萊逐客音書斷憑高首重回

春日寄張元傑

鵠鵠靡蕪郭菲菲杏萼林遠沙通極浦密樹暗遙岑春
野禽先覺水鄉雲易陰東岡無限好一月幾登臨

龍池宴客

弄水鳬羣下迎風雁序歸黃金汀柳變白雪浦梅肥江
闊浮清淺山晴拱翠微妙春知媚客時送一花飛

朱應登

同州道中

華嶽連馮翊黃圖別附庸長風開萬壑落日隱三峯野

望浮埃合鄉心遠樹重幽求今未得猶自抗塵容

繇金州舟行至洵陽

理棹出山阿迴舟泝渢波冷烟交遠樹飛嶂隱懸蘿地
域經秦少江流入楚多青樓臨廣道已聽大堤歌

對雪

對雪饒幽思清吟酒半醺撲簾寒未起灑葉細先聞風
急仍含雨天低欲隨雲晚看庭篠色漸喜白紛紛

觀楚人插秧

插禾憐楚俗田畛綠層層共道臨芒種那能避鬱蒸歌
詞人互答音節鼓相應但使民多粒寧憂穀價騰

渡淮

楚岸崩沙仄淮流積潦深沙明疑雪霽潦迴似秋陰舟
楫煩相待炎蒸喜不侵重憐行宦地獨感濟時心

水外長天盡煙中遠嶼銜即看乘泲漭已若釋憂讒波
撼青楓樹涼輕白紵衫舟人不愁思滿引夕陽帆

贈蔣子雲

別懷無近遠送子即淒然文采東都守明時萬里遷江
舟迴夕浪汀草暗春煙却望來時路長安在日邊

園居即事

首夏衡門裏清波四望通古槐垂密蔭細草結幽叢庭
灑黃梅雨簾鈎紫燕風林堂多發興興至復誰同

檐雨

中歲仕三已晚耕天一涯僻居寡儔侶開戶對桑麻檐
雨隨風亂溪流逐岸斜時時值野叟爭渡坐鷗沙

顧璘

八月十三夜與文濟時範質甫城西泛舟達秦淮
落日晴川裏輕風已自涼秋懷生自舫山翠撲胡牀問
路疑天上停杯待月光何人橫鐵笛吹過斗牛傍

六代煙華地狂歌得夜遊山河橫王氣水月弄清秋木
落長干寺雲殘太白樓共君須痛飲沈醉傍滄洲

吳都臺東湖書屋

水匯蒼梧郭天開綠野堂雲山秋滴翠冰井夏生涼藥

滿尋詩徑花垂點易牀少須康濟罷散髮任徜徉

除夕和邊太常庭寶

守歲椒盤宴歡然傍老親誦詩從稚子分肉遍鄰人
菽水慙三釜柴荆寄一身青燈能送喜金蕊夜開頻

贈子魚

與子三年別重來鬢已蒼論心風雨夕下榻水雲鄉畫
閣燈花煖秋杯竹葉涼息息行止意相對兩彷徨

共泛東潭錢望之

高人同野興移棹水西東岸仄垂蘿古沙虛積蓼紅哀
爭悽斷絳輕情倚秋風更有浮萍感俱忘痛飲中

宿排山道院

苦厭塵纓縛歡投道院清不逢黄石異唯見紫芝榮澗
水增茶品山光冷宦情寒宵得洗耳金磬雜經聲

武岡道中雨

界石記州名旗亭報客程山行頻陟降春雨易陰晴樹
引荒塗直花撩客眼明蠻方行欲倦翻憶武昌城

簡陳宋卿

頗怪陳無已尋詩日閉門空庭疎繫馬細雨負清尊節
序過梅萼春陰積蘚痕不嫌官舍冷燒燭對黃昏

陳沂

宮柳

嫋嫋春聲裏陰陰曉色中縷垂金屋暗花散玉樓空凝
露啼秦苑因風闢楚宮不知行輦處幾樹近簾櫳

山寺

出郭少人事更居林壑間僕因隨主嬪僧反愛吾閒碧
草生滿地白雲常在山城中會相問未卜幾時還

王韋

遊天寧寺

問年看井榦結夏閉山門路夾雙峯起泉流百道喧葡萄
纏廢棟蛻蝶舞荒園窈窕堪棲隱逢人未可言

芙蓉閣

緣曲疑難至憑虛恐未安狡猊金銷冷鸚鵡雪衣單竹

倚琅玕聽雲移倦畫看如何翠微上猶自著塵冠

三月晦日送致仁南歸

今日城南路楊花已不飛夢隨家共遠春與客同歸酒氣薰杯淺暮聲隔院微韶華如別意猶自戀餘暉

問柳

為問故園柳春光幾許深未忘攀折處猶帶別離心疎雨一川暝輕煙兩岸沈主人歸未得惆悵五株吟

與陳宗虞夜坐

不知秋已晚忽見菊花叢獨坐閒亭上相期細雨中燭
融蘭談紫杯泛杏膏紅未聽歌鐘罷蕭然動北風

攝山道中

旭日晴光轉重城曙景迷稻荒寒蟹出竹暝曉禽啼古
社棲危堞殘碑倚斷畦秋風振原野疲馬亦能嘶

田汝竦

御苑秋砧

露結金扉冷霜淒繡幕深塞羅出素手乘月響清砧高

入宮雲斷低隨閣漏沈無言為誰苦永夜助蛩音

席上贈推官還太平

萬國朝天罷孤城返旆行清秋看過雁落葉下高城海
岫臨淮出江雲入楚平定知先攬轡早晚望澄清

左國璣

夏日林居

五月虛簷下南風不斷涼雲來常帶雨花潤暗聞香怕
酒因妨客耽幽懶著裳楚騷辭賦客歌詠自疎狂

贈牛都督

壯極辭龍朔西湖隱豹韜風雲變山岳魚鳥散波濤楊柳吹羌笛荷花照錦袍醉來看伏石射虎氣猶豪

下第歸桐園小酌

無策干明主多情夢故林重來高閣上終日聽風琴綠酒邀狂態閒雲縱野心不知春已暮花樹碧成陰

贈趙將軍

老將搖征旆提兵出漢家幾年閒豹畧萬里渡龍沙驛

路村村雨邊城處處花幕南無戰馬終日醉聞笳

孫一元

同沈石田先生吳門載酒泛月

望望蒼茫裏閒雲度野田山空偏受月水闊不分天酒
醕初侵夜星河半在船白袍江海上樗散自年年

微茫風日暮歸鳥下青田暝色遙吞樹波容澹寫天豚
魚不吹浪萍葉故迎船笑殺鷗子浮家不計年

晚霧

晚來雨初霽煙火隔林微一徑牛羊入孤村桑柘稀長
天下遠水積霧帶巖扉月黑聞人語溪南種樹歸

西湖

十里山如拭西湖背郭流僧歸虹外雨雲抱水邊樓春
事多逢醉歌聲半是愁獨憐垂釣者吾欲共滄洲

荆溪道中

樹夾蒼崖立遙遙溪路微浪花迎棹尾山影上人衣飢
鶴鳴將下頽雲凍不飛還尋舊遊處日暮漁樵稀

飲惠憲副壯屏別墅

對酒清溪上聞歌杳靄間竹光酣晚日雲影動秋山好
鳥移時下名園盡日閒主人愛瀟散野客不知還

晚晴信步至城東草堂主人開尊留酌

東風吹晚步拄杖散閒身燕掠春陰薄鳩鳴桑葉新過
君文杏館呼我酒仙人政有烟霞骨還知麋鹿親

送吳希明

送子長楊渡白雲歌未終江山情共別燈火夢還同一

路黃梅雨半帆白鳥風波聲催棹急何處寄詩筒

石林

亂石生寒靄殘林帶晚曦松涼供睡穩山靜與詩宜入
洞隨猿跡登崖割壑脾竭來天壤內此地可棲遲

癸酉八月十七日同凌時東吳介夫僧古心遊

虎跑寺泉分韻得空字

長日尋幽處穿林興不窮把杯秋寺裏得句野泉中山
路晴吹葉石梁晚度風有僧同杖屢更洗世情空

同顧與成過蓉湖別墅分韻得禾字

龍山斜帶郭樹密野涼多湖氣熏晴日雲光淨綠禾茶
瓜隨地覓村徑與君過佇愛幽居晚兒童竹裏歌

遊龍井山

石磴攀蘿上天風倚杖吟鐘鳴山意動泉淨樹光深白
日觀雲物清尊坐石林歸來興更好纖月映孤岑

鳳林

聞道東林竹當年有鳳鳴濕雲吹不散涼月亂還明疎

見晚山色遙連茅舍清宣無逸士駕載酒寄高情

失鶴六首

有引錄五首

余蓄一鶴一夕開籠調舞忽爾高逝長望不還時
松房夜寂風月清炯獨引步顧影誦唐人想伊只
在秋江上之句因用首尾作詩六首付童子長歌
以招之

只在秋江上孤音何處聞夢回千里月愁入萬山雲欲
賦招難返長憐思不羣此時還憶汝書寄武夷君

只在秋江上連宵信不通忽看雲外影漫擬頂間紅樂府音猶是山家籠已空此時還憶汝學舞小庭中

只在秋江上長吟首重搔避煙茶已熟窺戶月初高山角聞孤笛湖陰夢小舠此時還憶汝把酒興空豪

只在秋江上高飛竟不還君應懷遠漢吾豈戀區寰雲冷難成夢月明疑扣關此時還憶汝何處訪蓬山

只在秋江上孤踪竟所之花間扶杖處竹外聽泉時野客來玄圃山僧寄紫芝此時還憶汝伴我夜吟詩

晚涼獨坐湖上荷花盛開

薄晚西湖上花開還自憐風回香冉冉鷗泛葉田田雲
色晴移水月明淨放船夜涼興更好獨坐釣絲邊

茅屋清溪上

茅屋清溪上漁歌入座聞水光偏映竹釣石自生雲地
近青藜杖身隨白鳥羣此中有真趣長日少塵紛

觀魚

步屢石池上觀魚坐短蒲翻萍銀潑刺吹浪雪模糊沙

白雲光淨日斜島嶼孤濛梁相對處吾亦偶忘吾

發漕湖

初日浮高樹清鷗散淺沙挂帆湖水上聞笛野漁家岸
拆菰蒲合雲迷山郭斜芳洲動幽興自起采蘋花

同吾進士謹遊陳遂初湖上草堂

野徑山光裏草堂湖水傍開樽臨絕壁岸情俯滄浪虛
渚秋光淨高雲晚木涼同遊得朋舊歌罷興偏長

溪堂落成鄰漁以箬笠草蓑見遺

卜築苔溪上幽居景自賒杜陵今避地龐老喜移家石
榻青霞滿山樽白月斜鄰翁惠釣具雲水足生涯

修竹亭

修竹何年種虛亭散翠陰清風自長夏赤日避高林裊
裊山雲淨娟娟溪霧深地偏人不到來往動高吟

鄭善夫

滄洲夏夕

失意對蒲柳滄洲昨夜風野雲依暮笛客况近秋空同

馬多年病虞卿薄暮窮此生隨造物行止合飄蓬

謾興

日月隨人事溪山共客情水清魚避影松靜鶴留聲粉
梓怡前輩文章達後生時聞扣牛角猶媿似要名

景暘

送陳戶部南使

使節乘春色家園喜便過草堂寒雨細江堰晚雲多綠
柳臨岐折青驪傍酒歌仍聞赴吳會勝事更如何

王崇慶

送馬守之澤州

寂寞山城裏春風未有花野塘新水細茅店酒旗斜故國音書斷長安道路賒何時共知己傾倒酌流霞

會馬君卿席上偶成

聚首成良會相看興亦嘉雲容思故國雪意暗京華落日催行李天風吹亂鴉多情憶年少惆悵木蘭花

祁縣夜坐

歲暮寒仍急長歌乘晚風荒涼憐小縣真率愛山童積
雪明殘柳衰顏歎轉蓬旅慄不可寐徙倚畫廊東

代州夜懷

雁門風雨夜獨館一含情落日連荒戍啼鳥近大城青
萍看自在白髮病還生明發平原路蕭蕭聽馬鳴

雨中將訪沱村走柬申意

寒雨乘秋細輕雲繞屋低清樽思對榻白髮怯衝泥曲
徑花將落平林鳥倦啼振衣吾扣訪一醉茅坊西

唐龍

雨懷

細細風前斷疎葉上聞亭臺隱山霧城郭入溪雲轉
益鄉愁亂還憐世事紛早秋身似雁天外獨思羣

萬樹秋雲裏孤山細雨時江泥沾落絮花霧困遊絲懷
抱為誰好親朋已久辭東溪讀書處一水護青帷

赦書坪渡渭

渭北津多柳荒荒野色連十家橋外市雙櫓峽中船冰

響潛魚聽沙明過鳥憐蹉跎歸色晚風雪又殘年

成縣馬融絳帳臺

太守傳經地簷輿趨月行栗亭秋雨歇魚峽夜川明竹
外雙旌出沙邊一吏迎荒臺迷絳帳失學媿諸生

毛伯溫

夜泊富陽

秋夜江風急樓船水月明汀洲散漁火煙樹隱山城雁
逐星河沒蟲依草岸鳴鄉心愁欲絕何處擣衣聲

周金

盱眙縣

每望盱眙縣常懷物外心煙霞城市裏雞犬辟蘿深飛
鳥雲中鳥鳴泉石上琴王喬如不遠薄暮欲相尋

潘鑑

錢家兄希仁

寒雁叫汀洲歸程不可留聊擣季路榦相送仲宣樓歲
晚荆門樹風微漢水舟鄉心吾欲折行役幾時休

奉謝中丞壯湖公以丹砂見寄

郢雪催殘臘。荆雲繫病身。
雁過南岳近。書在壯湖頻。
梅福非凡吏。桃源別有春。
丹砂開寶訣。攜我出風塵。

歐陽鐸

次萍鄉

明發宣風館。秋陰得氣饒。
雲昏山欲斷。泥濘路偏遙。
近縣峯頭塔。橫江屋底橋。
舊時銅漏刻。強半土中焦。

韓邦靖

中秋同何大復望月

令節他鄉酒關山獨夜情看花秋露下望月海雲生碧漢通槎近朱樓隔水明南飛有鴻雁作意向人鳴

雲中九月八日同張同年字川登高

佳節明朝是邊寒花未開愁心看極塞鄉思上高臺對酒清笳咽當歌白雁來天涯難會面風雨復相催

寄楊侍御師文

逐客地雖僻故人情不疎已勞千里駕復覩數行書別

思梅花後春風蕙草初江亭一杯酒何日話相於

戴冠

南夏

不作炎州客那知宇宙偏日車淹北戶火樹爍南天氣
溽乘宵雨雲蒸挾暮煙波斯夸白颺出入不曾捐

向夕

落日去遙岑孤村暝欲侵犁鋤歸別坂煙火散前林羈
鳥驚風起幽花入夕深時來須向晦吾亦閉門吟

晚坐

客居少從事晚坐共虛亭月轉江城白風迴竹嶼青深
棲宜倦鳥亂點恣流螢落盡增前葉天機無處停

遊西山寺

莫恨茲遊晚秋高興更清雲深山寺遠水落野橋橫路
入湖心去僧來谷口迎僕夫攜酒至下馬忽聞鶯

胡繒宗

登天柱閣

與客上江樓橫江山欲浮雲當天柱出月傍小姑流帆
外收吳楚尊前落斗牛瀰漫忽千里倚檻思悠悠

發寧羌州

皛皛雲將曙冥冥霧欲晴尋山聊駐馬貰酒不停觥泉
急水初凍霜團月更明逢人問前館鳥外即山城

錢琦

登獻花巖

獻花巖畔寺遊子數登臨花發年年好巖深處處陰風

前收落果坐久換鳴禽世路何多事看山偶會心

凌楷

高郵

孟城勞悵望煙樹一浮洲地濕人多病林寒葉易秋人
家留鳥跡國稅獨漁舟夜月珠光在多應照客愁

吳山

夜出江口

叢葦蕭蕭響連檣尾尾行風來宿雁起月上暮潮生隔

浦明漁火遙林聞犬聲蒼茫煙樹外不辨石頭城

楊慎

宋玉

文藻三閭並幽懷九辯知雲為巫峽賦雪作郢中詞茅屋還遺址蘭臺異昔時鴻裁誰獵艷空自拾江離

夕泊江陵

西陵白雪晴南浦綠波生海燕先春至沙禽恒夜驚竹房燈下市菱舫月中簏且醉桑郎酒休傷萍客情

梓潼道中

小市孤煙起平岡落日斜素林驚夕鳥
錦石戴寒花悵別關河晚憑高眺望賒
土亭今夜月流影夢還家

早發解州

旅宿先鴉起歸心與雁爭冰霜殘臘路
花柳上春城隱士嘲西笑騷人感壯征勞
生應物理奔走愧虛名

青橋

閣道盤雲棧郵亭枕水涯猿猱臨客路
雞犬隔仙家風

起青丘樹春迷玉洞花旅懷今日豁停幘問襯斜

九日微冷

巴諺教移火邠風戒授衣病嫌添夜漏寒覺愛朝暉弔
月吟蛩苦迎霜候雁稀黃花羞白髮不肯放荆扉

竹戶

竹戶少塵埃濃陰鬱不開靜聞清露墜涼送好風來鳥
下彈瓊粉蟲行篆紫苔無人共欣賞坐嘯獨悠哉

次張大理文柔別後見寄韻

垂老雲南戍。逢君海上州。桂招非小隱。萍泛是同流。江

漢詢幽側。關山慰阻修。欲酬平子贈。空有畔牢愁。

贈別陸後野

邂逅叶心期。燈花對酒卮。浮雲遷客夢。明月美人詩。館
署鳴雞早。關寒度馬遲。行過宜祿驛。好寄世南碑。

舟曉

羈心厭漏遲。未曉命舟師。樹過如人立。帆開覺岸移。天
梭星落織霞。錦日舒絲漸喜漁。村近炊煙出竹籬。

渡黑龍江時連雨水漲竟日乃濟

飛鷁朝暾霽停驂午漏分客心隨水急人語隔江聞雨
過添清氣風生愛縠紋中流歸棹穩跂望有來羣

送張惟信冊封唐邸因歸省母

鳴玉遙持節分珪重剪桐驛罿開蜀道蟋蟀采唐風稅
駕雲山外迴船月峽東還將南陔什一奏北堂中

近歸有寄

碌品宵征路堂川暝問津涼風吹遠思新月照歸人未

醒雞邊夢猶驚馬上身明朝攜手地先醉雪梅春

送高公次長洲尹

祖帳燕臺下官曹震澤東星躔牛斗近地脉海潮通
新水催飛鷁微霜度早鴻循良多暇日題咏繼文雄

玫瑰花

庭際玫瑰樹含芳當坐隅春盤紅瑪瑙曉帳紫珊瑚風
信翻霞錦天香綬露珠仙壺春醞好留著醉麻姑

春雪

南雪轉東風千門四望同愛穿珠箔透愁點玉階融竹
覆玲瓏葉梅殘綽約叢夕窓還映白蠟炬更添紅

春雨

春雨掩柴扉勾芒力尚微潤通瓜蔓水寒透木綿衣大
澤龍蛇遠空林鳥雀稀山翁多甲子杖屨候芳菲

夜泊

夜泊中巖下扁舟對萬峯一星高岸火幾杵上方鐘水
落灘聲急雲低雨意濃何人吹鐵笛潭下惱魚龍

費案

館中漫興和郭杏岡韻

霽色含朝暝庭深樹列衙清秋飛燕子白日下槐花郢
曲凌春雪巴詞麗曉霞人寰有瀛島塵土隔謳譁

地連黃屋外牆瞰玉河西風月憐新脫雲山憶舊棲隼
過鴉噪樹蟲出鶴錐泥隨意摩苔坐煙花入品題

身閒兼吏隱興味野人居劙筭深衷土分泉曲引渠鳥
聲林暝處山色雨晴初碌碌慙無補侯門肯曳裾

杳杳浮生計悠悠獨處心霜鴻孤影沒澗草幾叢深細
雨斜侵幕涼風暗拂襟雪花飛不定搔首問晴陰

土燕

利嘴穿虛壞卑棲足自支晚歸先認穴春哺亦知時避
隼棲林莽隨蟲掠水濱畫梁原不愛於世更何疑

汪必東

過劉家隔

崛起劉家隔周流漢水川白連雲夢澤青帶郢門煙蜂

蟻偏屯聚魚鹽競貿遷最憐貧土著蒿裏剪桑田

齊之鸞

邠州曉發

殘月征人早州城奧窓閒呼船渡涇水立馬望幽山禾
黍高低龍煙雲遠近關誰能渠白石種稻濁泥灣

涇北山橫絕穿厓細路高偏懸疑有麓峻極乃平臯嶺
露催禾黍秋風颯苧袍憂勤見遺俗無地立蓬蒿

靈祐驛次毛東塘韻

江路盤山轉頽垣此驛亭塞雲風外白畦菽露中青鳥雀無歸樹驛鰐不在坰誰教心匪石自信跡如萍

周廷用

過倒馬坡

未識埋輪路重經倒馬坡赤霄開棧道白日蔽雲羅古
磧羊腸遶飛泉鳥背過張生銘劒閣千古仰嵯峨

孫繼芳

送徐太史使遼府

節重天王使情親帝子家雲霄三殿詔波浪九江槎庾
亮樓前月湘娥廟裏花金樽高宴罷須擬弔長沙

李際元

雙流次韻

鼓角催晨發川原藹暮陰小溪清見石新柳細垂金洞
迴雲依樹山深鳥隔林天涯看落月盈縮飽經心

盧雍

泊頭晚泊欲訪子濟侍御不果

河流寒未凍市集晚猶喧日落新橋驛煙生獨樹村沙
船露燈影灘石帶冰痕不見西臺客幽懷誰與論

南大吉

聞駕幸朔方

鐵騎綠沈槍傳聞下朔方紫臺邊月白青海陳雲黃寢
閣雞聲早行營虎步長巡遊稱聖世車跡到幽荒

和馬仲房雨

涼風吹晝雨蕭颯自西岑細細緣郊迥霏霏度闕深雙

虹明夕照萬戶動秋砧為想西征輦應停北塞陰

常倫

經海子

積水明人眼蒹葭十里秋西風搖雉堞晴日麗妝樓柳
徑斜通馬荷叢暗度舟東鄰如可問早晚卜清幽

琵琶

紅袖揮金撥朱絃繫玉肩團圓懷夜月幽咽瀉春泉白
雪調終宴青雲遏遠天悠悠時斷續引恨似當年

竹

庭竹娟娟色虛堂肅晚陰翠交紅果潤清蔭碧苔深涼
月侵冰簾流風送玉琴歲寒終不改長此護雙林

頓銳

房山孔水洞

石竇水拖練靈源地絕塵浪傳飛白鼠無處隱賴鱗入
夏桃花盡經春荇葉新輕舠不可入豈有避秦人

山行晚興

葛屢衝山徑筇枝度石門鶩峯天外寺蛤嶼水邊村紅葉疎林影丹崖挂瀑痕炊煙生碧嶠嶺月閣黃昏

王濤

落星寺別蔣南冷

別意隨流水迴船過落星湖光侵寺碧山色入簾青鷗鷺馴沙岸魚龍駭石汀虛堂歸興渺烟浪晚冥冥

蔡昂

送朱伯仁任四川行都司斷事

白帝秋風動烏蠻夕照含憐君遊宦處地勢極西南殊
俗聊相問軍謀亦共參雄飛方自此休說鬚鬢鬢

劉儲秀

送龍長史之武昌

荆衡山漠漠江漢水湯湯送汝從茲去何時到武昌楚
筵堪設醴漢署憶含香壯上多鴻雁音書好寄將

簡霄

潞河舟中作

潞水經年別風塵又覺非岸蘆迎棹舞檣燕掠人飛澤國魚梁竭江城候吏稀人烟沙草外一縷起斜暉

陸杰

客舍

行役殊無已其如歲晏何宦情因拙澹鄉夢入秋多月巷千砧發霜天一雁過吾廬今夜好可惜掩松蘿

吳鎧

書營平侯祠壁

白草連天遠黃雲出塞平霜笳吹漢月寒笛弄秦聲北
海猶傳箭西戎未息兵屯田當寧意寧惜度金城

林大輅

雨中懷鄭成昭

徑竹色逾淨窓蕉聲轉寒流年頻閉戶世事偶凭闌遙
郭見秋水喧江聞暮灘石村雲卧者遲爾話悲歡

林炫

十四夜月

今夜揚州月清光已勝前遙升滄海外先到客亭邊雲
度同飄忽風來一灑然細瞻金粟影猶少半分圓

次韻贈朱青岡太守郊行

聞得農人語鶯花未足憐夕陽牛背笛春雨郭東田政
簡官如水時豐俗自便村村鳴社鼓歡喜說今年

桑溥

榆林道中

迢遞榆關道西風卷客旌寒沙迷古塞落日下孤城水

險遮蕃騎山高列漢營君王方偃武邊將莫言兵

李濂

田廬暮歸作

朝遊南郭墅薄暮小車歸始識閒居樂無言夙志違入
村逢酒熟近圃惜花飛不盡酣歌興孤城下夕暉

村居

浮名除宦籍初服返田家臘酒猶浮甕春風自放花抱
孫探雀穀留客剪椿芽無限村居樂逢人敢自誇

太原中秋

紫塞中秋月青天萬里情他鄉一尊酒獨對太原城水
霧戎戎合陰蟲故故鳴雁門諸戍苦莫遣照邊營

蔣山卿

田園秋日雜興

曲逕入林丘柴門野水流松間還倚杖石上復垂釣借
問家中婦今朝有酒不前山夕陽下吾意正悠悠

板橋橫浦直籬合傍隄斜年熟村多釀秋深菊始華溪

魚寒聚藻田
解夜行沙野趣
渾無厭吾生即有涯

久作山林客
虛為野老知
鶴衣行曳屨
烏帽坐彈碁
煮茗頻燒竹
炊羹旋刈葵
來朝菊花節
相約過東籬

清夜耿不寐
端居興杳然
蛩吟入床下
葉落墮階前
麥隴耕殘月
茅簷炊曉煙
祗緣高卧穩
自覺懶情偏

花殘

寂寂門空閉
菲菲花欲殘
賞心不相見
對酒若為歡
小逕芳烟靄
疎簾細雨寒
一年春又謝
惆悵思無端

薛蕙

重遊蕭氏園

別此真如昨重遊換物華粉滋曾倚竹紅淺舊看花沙
阪繁林曲山籬逐水斜城南咫尺路未覺往來賒

臺上

臺迥通風榭窓虛近水城卷簾殘暑去攜手晚涼生碧
樹藏雲暗銀河度月明醉來愁鬢髣只作畫中行

邯鄲館中

門對累墨靜城臨睥睨愁人倚高閣清夜動悲笳月
暗雲生葉風寒露作花徘徊望牛斗鬢鬃辨京華

泛溪

避暑清溪曲舟行路不窮詩成孤嶼上酒盡夕陽中綠
竹含秋色紅蕖送晚風歸來就明月移棹水雲東

駕幸南海子

詔幸芙蓉苑傳言羽獵行三驅陪上將四校出神兵列
戟圍熊館分弓射虎城風雲日暮起偏遙漢皇營

春日禁中遇雪

紫禁春朝雪花飛彩仗新霧交隨雉尾風引避龍鱗掌
濕金人立窓寒玉女顰翠華沾灑處遙憶屬車塵

答王允升省中對雨見憶之作

康樂愁霖唱平原苦雨詩故人歌此曲贈我慰相思薛
芳勦垂青閣芙蓉泛綠池今朝一樽酒最恨不同持

海棠畫扇

西蜀繁花樹春深亂蕊紅還憐彩扇上宛似錦城中影

轉團團月香含細細風江淹才力減賦爾若為工

晦日夜集

晦日歸休晚良遊惜後時卻持長夜飲更賦早春詩雲
霧窓中入星河閣上垂何須花與月行樂始相宜

春夜過時濟飲

露淨開樽處天青岸晴時素雲將月上香霧任風吹為
樂常苦晏含情復待誰徑須成一醉莫遣酒行遲

夏日遊道觀

隔竹窺丹洞臨池坐碧沙翠杯寒玉水石盤淨雲芽展
簾來風色吹笙上月華休論河朔飲詎似醉流霞

陳真人館中賞荷花作

別館瀛洲麗新花菡萏香紅衣迷日色翠蓋寫波光雨
過金塘濕風生石檻涼客來修竹下回首見瀟湘

江中四詠送黃日思韻限本題同諸公作

江霞

春江變氣候孤嶼發雲霞散影搖青草流文漾碧沙紅

泥迷燕子丹洞失桃花水宿淹晨暮應憐謝永嘉

江雲

謝客弄春水江臯生綠雲紛紛初散綺葉葉漸成文蔽
日皆相映流風乍不分何因可持贈欲以慰離羣

江花

百丈牽江路行穿夾岸花時憐一水曲遠愛數峯斜林
下見垂釣溪邊逢浣紗武陵如在眼鬟像羽人家

江猿

舟行轉江峽處處響哀猿極浦雲方合連山雨正昏接
條時自挂飲水復相援不待三春盡先傷遊子魂

六月八日西闕遇雨

窈窕西清內參差水殿連歸雲向平樂飛雨集甘泉明
月裁班女迴風唱麗娟龍池初望幸來往木蘭船

泛舟

水口移舟入煙中載酒行渚花藏笑語沙鳥亂歌聲晚
棹沿流急春衣逐吹輕江南采菱曲回首重含情

郭外

郭外平蕪迥溪邊小徑斜客行迷野竹鶯語隔林花多
景每難遇孤遊還自嗟佳期竟何許脉脉向春華

酬惟喬贈巾

野巾初著日心賞竟朝曛試正行窺水從欹卧看雲坐
翻嫌月露出每避塵紛顧影還相笑風流媿使君

紫微

紫微開最久爛漫十旬期夏日逾秋序新花續故枝楚

雲輕掩冉蜀錦碎參差卧對山窓下猶堪比鳳池

九日同何仲默出郊

九日登高會同人載酒來寒城一以眺秋色正堪哀零雨晨初霽浮雲午未開南飛有鴻雁為爾立徘徊

玄明宮後圃石山

出郭仙城近探幽福地遙珠林行窈窕錦石上苔堯雲裏仙人酒山中玉女簫蓬萊去何許東望海邊潮

顧璫

遊西山宿廣智寺待月

本來遊客意欲與月明期碧海深何許清光望轉遲草
香聞露墜林暗見星垂幸對尊中酒殷勤坐不辭

獨酌

青春為客晚白日閉門幽短榻能供卧單醪不遣愁苔
衣新雨淨雲葉晚陰稠故國蒼山外長歌獨倚樓

隱吏亭雜詩

卷幔青山入拋書白日長苔茵承屐穩竹粉惹衣香病

喜諸禽戲貧嗔減鶴糧自堪稱隱吏不用問行藏

春日與張萬里城南訪阮仁卿

春事已如此郊行亦偶然芳筵甘野蔌輕服快晴天
谷靜聞流水江寒起暮煙病軀登頓倦藉草即思眠

幕府山泉

隔嶺通江脉分為石上泉聲兼松韻夾寒浸月華鮮列
籍依沙淨浮杯逐浪圓清冷聊一酌塵意已翛然

劉天民

巴田

巴田不成井逐壘細開塍灌水分山溜燒畲去野芳三
時勤不輟八口飽方能寄謝當塗子民心未有恒

林春澤

濯纓閣會李巨川張伯初小酌

汨汨出齊郡悠悠下廣川子城叢灌木官閣俯清連野
興飛鳬外狂歌落日前新亭風景別不用淚潸然

王茂才山亭宴集

愛爾草亭靜青春聚薛蘿藥欄明客眼花逕遙童歌杯
落溪風細山深野翠多微酣聊縱步蕙帶拂雲和

戴欽

同諸公寺中對雪

入寺金沙淨開林素雪飛風含珠閣動花傍藥闌輝酒
伴能相覓春筵賞不違仙郎有高唱轉覺和人稀



御選明詩卷五十五

國朝典故

總校官庶吉士臣侍 朝
校對官檢討臣蕭九成
謄錄監生臣李 本